

欽
定
全
唐
文

欽定全唐文卷六十六目錄

新文藝出版社藏書

穆宗 三

蠲免京畿懸欠勅

停抽俸錢勅

責降宗正少卿李子鴻等勅

定錢陌勅

命諸道留使錢減貫勅

減康買德罪勅

甚雨日放朝參勅

褒卹田穎勅

流寵驥溪州勅

流唐慶崖州勅

命皇太子檢校軍國勅

答宰臣請上尊號表批

景陵禮成優勞德音

登極德音

南郊改元德音

欽定全唐文卷六十六

穆宗 三

蠲免京畿懸欠勅

京畿二十有二縣欠元和十四年京百司職田二十二萬九十一石束貫等京畿百姓聞甚艱貧頃差搬運軍糧今又修營陵寢雖因緣驅役皆給價錢而屢有牽召頗妨農畝豈可更徵懸欠重使憂愁其所欠並宜蠲免其合受納所欠職田或見在官班各請厚俸或近終考秩稍可餘資宜體朕懷以寬人力

金史卷之三
停抽俸錢勅

朕聞帝王所重者國體所切者人情苟得其體必臻於大和如失其情是曲於小利況設官求理頒祿責功既有常數寧宜就減近者以每歲經費量入不充外官俸料據數抽貫再三思度終未安穩念彼外方或從卑官一家所給三載言歸在公常甘於潔廉受祿又苦於減尅待我庶吏豈其然乎雖憂國之誠固須贍助而恤人之慮將起怨咨必若水旱爲虞干戈未戢事非獲已人亦何辭今則幸遇豐登又方寧謐九州之內永絕妖氛三邊之上冀除烽警

自宜尅己以足用安可剝下以爲謀臨軒載懷實所增愧其度支所準五月二日勅應給用錢每貫抽五十文都計一百五十萬貫文並宜停抽

責降宗正少卿李子鴻等勅

宗廟之禮嚴肅居先薦告之詞精審爲切方將昇祔安可九室皆同旣已祧遷豈宜四昭咸在宗正少卿李子鴻實司祠事誤進祝文罪有根源理難降減宜停見任博士旣失於詳定御史又曠其監臨若不薄懲恐乖至敬王彥威宜罰兩月俸料削一階崔鄆宜罰一季俸料削兩階其後

禮合變文事宜中節者太常博士不得更稱舊制致有差殊

定錢陌勅

泉貨之義所貴通流如聞比來用錢所在除陌不一與其禁人之必犯未若從俗之所宜交易往來務令可守其內外公私給用錢從今以後宜每貫一例除墊八十以九百二十文成貫不得更有加除及陌內欠少

命諸道留使錢減貫勅

諸道州府每年徵納兩稅除送上都外留州留使錢緣草

賊未殄費用滋廣兩稅之外難議加徵然其饋運之閒又須得濟諸道留使錢宜令長吏於諸色給用中每貫量減二百文以資軍用事平之後即任仍舊

減康買德罪勅

買德尚在童年能知子道雖殺人當死而爲父可哀若從沈命之科恐失原情之意可減死罪一等

甚雨日放朝參勅

秋夏之閒嘗多水潦如緣暮夜暴雨道路不通車馬宜便放其日朝參委御史臺勾當仍每日聞奏如雨不至甚不

在此例

褒卹田穎勅

贈工部尚書田穎夙彰忠勇累効勲勤方議獎能遽聞棄
代永言嗟悼須有優矜宜賜絹布一百五十匹端度支遂
支給仍令所在州縣傳遞送至許州委李光顏官給葬事
其男克素待過卒哭亦委本道量與軍中職事收管驅使

流龐驥溪州勅

長吏犯賊其數不少縱寬刑典難免鞭笞但以近逢鴻恩
減等雖節文不在免放情理亦要哀矜龐驥量除名流溪

州其贓付所司準法

流唐慶崖州勅

唐慶入己贓盈五千貫據罪定刑實難全宥但以惟新之日政務從寬要示含容俾從流竄宜除名長流崖州

命皇太子檢校軍國勅

勅朕獲嗣祖宗祇荷重器常恐失墜若陷泉谷而萬務所繫憂勤是切宿疹在體不遑自安陽氣歊蒸沈恙復作不能日臨庶政親領萬幾皇太子湛睿哲溫文孝敬明敏其軍國政事宜權令檢校百辟卿士中外臣寮宜竭乃心輔

我元子同底於道以寧邦家宣布朕意庶使知悉

答宰臣請上尊號表批

朕以菲德初承大寶嚴恭夙夜修己臨人燭理未明舉政多闕雖克展郊禋之禮或未稱瑞應之符而俗尚彫訛人未康乂所患德之未立不患名之不尊至於北狄求和西戎即敘南越投戈而率化東夷繼踵而來王不候七旬之期自銷積紀之弊此皆祖宗垂祐公卿叶贊之力也朕何有焉遽議虛名深愧未稱卿等志思將順誠切忠君宜體至懷勿徇虛美

景陵禮成優勞德音

勅朕聞孝莫大於慎終仁必先於卹下慎終則勿之有悔
卹下固可使忘勞自陵寢戒期郊甸充奉屬春耕肇起宿
麥繼登百役所集羣司所備上懼一物之遺缺旣懷罔極
之誠下恐兆人之疲瘵又思不擾之德方將號從靈駕親
至山園情爲事奪竟不獲遂賴一二元輔洎内外庶官嚴
敬協心克修典禮永言嘉歎感咽增懷義有必酬式舉勞
以申命惠無不浹仍蠲賦以加恩山陵使兼陵所攝太尉
行事宜與一子六品正員官山陵禮儀使與一子八品正

員官山陵副使柳公綽按行山陵副使李翱並賜爵一級
各與一子出身橋道置頓使賜爵一級仍與一子官內山
陵使賜絹一百匹特加一階山陵修築使賜絹七十匹特
加一階監修橋道使賜絹七十匹內按行山陵地使賜絹
五十匹內山陵副使及修築副使各加一階鹵簿儀仗使
並賜一級各與一子出身橋道置頓使各加兩階昇梓官
三品以上賜爵兩級四品五品賜爵一級六品以上各一
階其中有合選人前資見任各減兩選神策六軍修築山
陵官健各賜絹兩匹其檢校軍使及押當所由四品以上

賜爵一級仍加一階五品以下各加兩階陵所造作押當
使等三品四品各加兩階仍賜爵一級五品以下各加兩
階其中正員六品以下合選人前資見任各減三選白身
各賜勲三轉諸司諸使應緣山陵修造及專知修造作并
諸色檢校執當官典白身及直司掌上巧兒工匠等五品
以上各加兩階六品以下各加一階合選人前資見任各
減兩選白身各賜勲兩轉其給直和雇者不在此限吉凶
儀仗諸色行從官等五品以下各加一階至三品五品未
合敘者賜爵一級六品以下各加一階如其中有合選人

前資見任各減一選諸司諸使押管當官置頓舉幕往來
檢校軍將中使等五品以上六品以下並加兩階白身各
賜勲兩轉合選人前資見任各減兩選太極宮宿衛官及
中使大內皇城留守及押當官等五品以上各加兩階六
品以下各加一階白身各賜勲兩轉撰謚冊哀冊謚議書
冊文及讀謚冊哀冊書寶讀寶官等五品以上賜爵一級
六品以下各加一階合選人前資見任各減一選鑄造寶
冊裝冊及檢校官五品以上各加一階六品以下各賜勲
兩轉合選人前資見任各減一選題本主官加一階昇寶

冊官五品以上各加兩階六品以下各加一階其中合選人前資見任各減一選押鹵簿儀仗挽郎等見任者各加兩階合選人前資見任各減兩選山陵禮儀橋道置頓判官五品以上各賜爵一級仍加一階六品以下各加兩階其山陵使司官與軍將加一階合選其知東渭橋官非時放選仍優與處分知道官前資見任各減三選知頓官前資見任各減兩選按行陵地儀仗鹵簿判官及諸副使判官并諸司諸使監當雜職掌官吏等五品以上各加兩階六品以下各加一階合選人前資見任各減兩選白身各

賜勲兩轉其挽郎放出身後七選許集挽士代哭挽歌等
各減三年勞合選者各減兩選無勞可減者各賜勲兩轉
京兆府及諸州僱斲元官石匠及官寢作頭巧兒雖給庸
直就中辛苦各賜勲一轉諸色行事官及齋郎禮生并陰
陽官三品以上各賜爵一級四品以下各加一階合選人
前資見任各減一選白身各減二年勞考滿人并放出身
其數處職掌任取穩便從一項處分應緣二仗三衛驍騎
及諸色人匠并緣山陵應役人夫車牛等各委本府長官
本軍本使本司量事優賞諸道應副山陵參佐軍將等各

加一階諸色職役官吏應或減還可減者宜令所司非時與處分如有諸色流外充者各於本色中量減二年勞考可減者選日優與處分京兆府今年夏青苗錢應合徵共八萬三千五百六十貫文並宜放免仍委令狐楚便以山陵用不盡綾絹依實支付京兆府充代百姓納青苗錢其近迫鄉村坊市屋宇什物田苗等有被損毀并近陵百姓偏有使役理宜節級優賞並委京兆府審細勘覆聞奏應隨靈駕挽郎挽士諸色人夫等泥雨中不免損傷委京兆府審細訪姓名聞奏量加優恤其山陵禮儀鹵簿儀仗使

并諸軍諸使諸司將官吏如執當務重功效尤異委本軍
本司本使具名聞奏中書門下商量奏聽進止宣示中外
咸使聞知

登極德音

著大明者日也出乎震而見乎離則八紘開朗萬象昭煥
孚大號者風也發厚地而鼓羣動則氛蒙盪滌鬱伏舒散
王者如日之照臨故聖躬作而庶類覩如風之號令故德
音降而兆人從朕以寡薄方茲嗣服荷天地之眷佑承祖
宗之祚運夙夜祗厲懼不克周永惟風教之流弊毗俗之

疾苦思布濟時之政宜宏利物之澤庶有以導迎和氣感致懽心宜申在宥之恩用啟自新之路可大赦天下自元和十五年二月五日昧爽已前大辟罪已下罪無輕重咸赦除之唯官典犯贓及故殺人者不在免限左降官量移近處已經量移者更與量移如復資者即任依常調選責授降資正員官者亦與進改亡官失爵不齒者量加收敘流人及僧尼道士移隸者節級放還及移近處諸色得罪人中如先有勅云縱逢恩赦不在放還之限者亦並與量移若曾任五品已上官者奏待進止左降官及流人先有

官者如已亡歿各還本官自今日已前曾有痕累禁錮等一切並與洗滌永惟罔極弓劒不留奉號終天用深哀感應緣山陵制度及喪儀禮物宜委中書門下及諸司長官等博詢故實務遵禮度必誠必信副朕哀懷所緣山陵造作及橋道置頓所須並以内庫錢充不得輒令科配百姓度支諸州府監院從貞元八年已後至元和十年已前共計欠錢一百一萬五千九百餘貫鹽鐵使諸監院應欠元和十三年已前錢物除準前制䟽理外共欠一百八萬八千六百餘貫石等戶部諸州府從建中三年已後至元和

十三年已前應欠在州貧窮并遭水旱逃亡百姓腹內兼
連接淮西河南賊界并燒劫散失及賑貸百姓錢物五十
萬九百餘貫石等京兆府從元和五年已後至十三年已
前應欠諸色錢物共四十一萬九千六百餘貫石東等州
府監院百姓欠負但不在官典所由腹內者一切放免諸
州府除京兆河南府外應有官莊宅鋪店碾磑菜園鹽畦
車坊等宜割屬所管官府諸道除邊軍營田處其軍糧既
取其正稅米分給其所管營田自爲軍中資用不合取百
姓營田并以瘠薄地迴授百姓濃肥地其軍中如要營田

任取食糧健兒不得輒妄招召天下百姓等自屬艱難棄其鄉井戶部版籍虛繫姓名建中元年以來改革舊制悉歸兩稅法久則弊奸濫益生自今已後宜準例三年一定兩稅非論土著客戶但據資產差率其擇刺史縣令宜委門下中書省御史臺官有所諳知即具聞薦如贓汙賤人當坐舉主權稅之法雖合同遵瘡痍之餘姑欲寬假其河北稅鹽宜委度支與權鹽使審細商量具條疏聞奏內外百官食料錢一倍至五倍已上節級放免仍每經十年即內外百官各賜錢一萬貫充本各據司額大小公事閒劇

及當司貧富作等第給付應屬諸軍諸使諸司人等在村鄉及坊市店鋪經紀者宜與百姓一例差科不得妄有影占如有違越所司具所屬司井人名奏聞如聞度支鹽鐵監院等所在影占富商高戶庇入院司不伏州縣差科疲人偏苦事轉不濟如有此色仰當日勒歸諸道州縣除正勅率稅外不得妄託進奉擅有諸色推率天下州府除兩稅合送上都錢物及所司常貢外輒不得別進錢物并方鎮得替後至城亦不得輒有進獻掖庭籍沒罪人妻子等宜並放歸親族其諸軍先擒獲吐蕃生口配在諸處者並

放歸本國願住者亦聽内外文武見任及致仕官三品以上賜爵一級四品以下加一階諸道軍將士等普恩之外賜階爵有差二王三恪文宣王及公主縣主嗣王節級賜與一子官及出身宗子有才行者悉以名聞奏仍委中書門下量才敘用皇五等已上親皇太后二等已上親並賜階爵武德已來配饗及第一等功臣并張巡許遠南霽雲顏杲卿真卿等尚父子儀贈太師晟贈太尉秀實子孫中與一子官有差其中有才行堪任臺省者量才敘用中書門下並諸道節度使諸州府長官東都留守及京常參官

諸軍使等父母祖父母並節級與追贈父母存者與官封
已經追贈者更與改贈興元奉天功臣及蔡鄆立功將士
普恩之外更賜勲爵亡歿者與追贈中書門下及節度等
使東都留守度支鹽鐵使京兆尹諸州刺史等賜一子官
有差在城諸軍將士節級賞賜仍加階爵京西北及振
武天德八道節度都防禦使下及神策一十二鎮將士等
共一十八萬六千七百餘人都賜物一百八萬一千八百
餘匹東宮官及侍讀普恩之外賜爵加階仍普與進改自
國哀及行事職事官普恩之外賜階爵及勲其受顧命撰

制誥及冊文并寫制誥官等特加一階賜爵一級並賜上
柱國優與進改書冊官特加一階尊親之禮既展於徽章
廣愛之恩宜申其慶賜皇太后諸親委中書門下量等第
節級優賞文武常參官及外官職事五品已上有母者並
加邑號如已至郡太夫人者許回授周親應緣皇太后冊
禮職事官並節級賜物天下百姓有父母祖父母高年者
賜粟帛城內蕃客等並節級賜物今年正月二十八日至
閏正月三日宮苑諸門守捉西內立仗將士等量加改轉
應內侍省及內坊宮正等並加賜勲爵常參官及諸州刺

史少尹赤令有先得替及因病假滿百日解官并終制未授官者及致仕官並與進擬天下諸道州不得擅有閉糴禁錢務令通濟内外文武官及諸色人等任上封事極言時政得失才有可觀別當甄獎應流外色役人等賜勲有差

南郊改元德音

門下朕聞自昔盛王之所以合天地諧神人莫過乎誠敬致其誠展其敬莫重於祭祭之大者莫大於郊廟故必躬行而心奉之然後百靈助慶萬國蒙福此帝王之孝也我

國家祖功宗德立極配天日月所照雨露咸被孝思善繼
聖敬允升郊丘歲奉於嚴禋宗廟時修其明薦朕以冲昧
自獲纘承仰荷瞻命懼不克享幸天多祐俾歲大穰河朔
底寧邊封靖謐及此元日至於上辛式遵典禮有事郊廟
當祗見之夕感慕增懷洎大報之辰誠敬彌勵因體元而
改號用敷化以覃恩可大赦天下改元和十六年爲長慶
元年自正月三日昧爽已前大辟罪已下罪無輕重已發
覺未發覺已結正未結正繫囚見徒咸赦除之唯故殺人
在十惡內者及官典犯贓不在免限左降官量移近處已

經量移者更與量移如復資者即任便赴選集丁憂去任服闋日亦與量移如有親故在者都任於所司陳狀便與處分不必更待本州府申請如準前制已合量移有司未注擬者並任累敘并別勅因責授刺史已下降資正員官亦與進改亡官失爵放歸不齒者量加收敘流人未到所在及已到者與量移近處已量移者并放還僧尼道士移隸者亦與量移近處并得罪人已亡歿家口未放歸者一切放歸如有情願住者亦任左降官及流人先有官者如已亡歿各還本所自今日已前所有痕累禁錮及反逆緣

坐等一切並與洗滌其左降官及流人如所坐之罪本因
犯贓到任及所配處未經二年者不在量移其天德軍流
人滿十年即放迴其糧賜委防禦使便別召人充補營田
驅使朕自君臨萬寓常思子惠羣生每念困窮猶勞杼軸
宜加恩於寰海用蠲賦於齊甿天下百姓今年夏稅每貫
放一百五十文底貢之宜本於任土阜財之道亦在使人
天下州縣應徵科兩稅榷酒錢內舊額須納見錢數者並
任百姓隨所有匹段及斛斗依當處時價送納不得邀索
見錢度支鹽鐵戶部應納茶稅及諸色見錢兼糴鹽價中

舊額須納見錢數者亦與納時估匹段及斛斗其輕貸即充上供雜物當處支用如情願納見錢者亦任穩便永爲常式京城坊市聚貨之地若物無集處即弊生其中宜委度支鹽鐵使於上都任商人納權糴諸道監令在城匹段各有所入即免物價錢於外州仍委所司具條流聞奏其公私便換錢物先已禁斷宜委京兆府及御史臺切加覺察理財正辭弊必除於既往蠲逋已責禁方絕於將來應度支鹽鐵戶部三司所管諸官吏所由人戶等欠負元和十三年已前諸色錢物斛斗等各委本司盡理勘實如是

貿易估招入已隱欺即準條處分如緣收貯年深盤覆欠折水火沈贖保累剝徵并緣用兵之時所在貯備雜物準擬軍需及賊平之後不堪上供勒令迴變因有損折如此之類除檢責家產及攤徵原保外如實無可納空掛簿書連年囚禁者宜令各具色目聞奏並與疏理其諸軍諸使應有欠負亦準此處分天下兩稅外不得別有差率刺史若違越委觀察使舉奏觀察使或有事乖格勅刺史不得接受已有前勅宜重申明仍委御史臺嚴加訪察不得妄稱供應及軍府逼迫捍禦疆陲必先財力使其節用方可

實軍訪聞邊上諸鎮比緣使臣所到或私申饋潛耗資儲
假此爲辭因而積弊將令完緝功在立程應京西京北邊
上諸軍州鎮自今已後如有中使及郎官御史奉使到所
管並不得與人事比部令勾諸司錢穀載在格令其事訛
謬歲月已深宜令中書門下精擇比部郎官修舉典制勾
諸司錢穀仍立時限具條疏聞奏山河之固險易不常疆
理之閒廢興從便今干戈已戢寰宇大同壤制之宜所資
垂久應諸道諸州及諸縣宜委中書門下審量制置其州
縣兼委觀察使刺史量閑劇利便可併省者具事宜聞奏

河北諸道管內自艱難以來久無刑法各隨所在徵斂不時色目至多都無藝極宜委本道觀察使勘實據桑產及先各徵配量輕重圍定兩稅務令均濟其刺史已下俸料仍據州縣戶口徵科多少并職田祿粟作等第河南諸州府例條䟽分析聞奏如聞河南北州縣凋殘戶口未復官員備設曹局至閒或非其才徒費其祿其縣州官各據都邑大小量公事多少留置餘並權停仍先於久經假攝才行彰著人內選擇委觀察使訪察勘實各具前後厯攝勞考約前銜資序便與正授如先無官者以假攝年深課績

尤異各具事績聞奏委中書門下類例如資序或未相當
且令權知兩考候有政能即與正授其見在正官多是流
外不任公事切宜揀擇堪留者全給課料使其盡心合減
省者並勒停罷仍據已得資常選之內與減兩選未得資
者任以前銜便放選集仍名銜申牒有司自今已後委吏
部切加揀擇量才比擬所冀惠政及於疲人應諸道管內
百姓或因水旱兵荒流離死絕見在桑產如無近親承佃
各委州縣切加檢實據桑地數具本戶姓名申本道觀察
使於官健中取無莊園有人丁者量氣力可及據多少給

付便於公驗任充永業不得令有力職掌人妄爲請射其
官健仍量借貸種糧分番上下各任營農放三年差稅年
限滿後據桑地準例團定合當下番營農者停給月糧其
衣物賜及雜賞給並如舊應天下典人莊田園店便合祇
承戶稅本主贖日不得更引令式云依私契徵理以組織
貧人天下榷酒錢有已分配百姓處又別置酒店官酤及
諸色榷率宜切禁斷應亡官失爵及放還流人如有先莊
田不經沒官被人請射本主及子孫到並委州縣却還務
令安業州主牧宰職在親人其有徭賦不均流庸未復刑

罰不中教化未行必當分命使臣大明黜陟三代致理皆重學官兩漢用人蓋先經術天下諸色人中有能精通一經堪爲師法者委國子祭酒訪擇具以名聞將加試用稱成康之盛則舉措刑讚文景之德亦言斷獄況自文祖太宗皇帝親錄囚徒躬省冤滯法官所選豈易其人其大理寺官屬比來吏部所授多非其才宜令精選有志行詞學兼詳明法律注擬其有課績特殊堪任朝獎者臺省官有關宜先選擇剖符共理按部分憂繫於生人所任最切近日刺史或一歲再遷或累年尚滯勞者不勸否者不懲自

今郡守勤奉詔條清廉可紀者四考與轉其有殊績及久
歷外郡者或就加章綬或擢列朝行庶使內外有倫遠邇
無異其刺史有闕委中書門下選擇當時進擬不得稽遲
其江淮諸道縣戶一萬已上稅錢五萬貫已上皆謂之大
縣所擇縣令宜準元和二年敕節文處分其去年二月五
日敕書中所薦縣令兼取散試官及白身并見任官者不
學而製其弊固甚未操而割所傷則多豈有白身及散試
官未經試吏堪任縣令永言及此殊匪朕懷又見任官更
求舉薦亦長僥競不可施行其散試官及白身並見任官

令吏部並停注擬自今已後所舉縣令更不得舉薦此色將致乎理必在官循其方將盡其才必在吏久於政先朝深知積弊首舉具員近日因循更不遵守遂令躁競者不安其位惟望速遷自今已後宜委中書門下所有除授並依元和二年具員勅處分其諸道年終亦宜準承前勒停如刺史於留州數內妄有減削非法破用者委觀察使風聞按舉必當重加科貶以誠列職如刺史不承制勅不得稱有公事請赴本使其錄事參軍亦不得擅離本州將欲化人必先興學苟昇名於俊造宜甄異於鄉閭各委刺史

縣令招延儒學明加訓誘名登科第即免征徭天下所置
常平義倉準元和元年正月赦書節文處置未便者委刺
史各具事由條件聞奏有司更與商量處分郵傳所置令
式有文近年以來多有逾越遂使馬畜損耗供億勞煩宜
準元和二年赦節文處分天下諸州府縣官吏應行鞭撻
本罪不至死者或假以責情致令殞斃宜委御史臺及出
使郎中御史等切加察訪聞奏天下諸道或閉糴禁錢自
爲條約自今已後切宜禁斷仍委鹽鐵巡院勾當其內外
文武及致仕官三品已上賜爵一級四品已下各加一階

陪位白身人賜勲兩轉故尚父汾陽王贈太師晟贈太尉
秀實各與一子八品官顏真卿杲卿張巡許遠南霽雲各
與一子出身武德以來功臣子孫量加獎用中書門下及
節度帶平章事者各與一子八品正員官祖父母及父母
並與官封父歿母存者與邑號已贈已封者更與追贈及
邑號禮儀使大禮使度支鹽鐵使京兆尹各與一子出身
文武常參官并致仕官及諸道節度觀察經畧等使及神
策等諸軍使父見存者量與致仕官母存者與邑號父母
亡歿與贈官及邑號東都留守及諸道節度觀察經畧等

使神策金吾六軍將軍威遠鎮國軍等使各與一子出身
陝州奉天興元功臣更賜勲爵有差身歿未經追贈者並
與追贈應緣大禮移仗宿衛御樓立仗將士普恩之外賜
勲爵有差仍準舊例賜錢物二十萬四千九百六十端匹
貫大禮職掌行事官吏及留守等吏賜勲及加階升壇殿
行事官更特加一階應在城內蕃客等賜物有差常參官
及刺史有停替及病假解官及終制未授官者委中書門
下量才進擬其有情願授致仕官者亦聽天下諸色人中
有賢良方正能忠言極諫博通墳典達於教化軍謀宏遠

堪任將帥政術詳明可以理人者委有司各舉所知限今年十月到上都天下百姓高年者賜米及綿絹有差其元和十五年二月五日赦節文中有未處置者有司速舉施行庶令大信洽於天下百司之職布在舊章特舉正經必歸理本宜令尚書省應掌閑幕士御士醫工獸醫門僕藥僮御書手楷書手典書流外署等各賜勲兩轉通氣炳靈是資嶽瀆禦災捍患爰想聖賢將達明誠式崇祀典其五嶽四瀆宜委本州府長吏備禮致祭當極豐潔以副如在之誠名山大川及自古聖帝明王忠臣烈士各令所在以

禮致祭亡命山澤挾藏軍器百日不首復罪如初赦書有
所不該者所司具作條例聞奏敢以赦前事相告言者以
其罪罪之赦書日行五百里布告天下咸使聞知主者施
行

欽定全唐文卷六十七目錄

穆宗四

優卹將士德音

赦鎮州德音

平汴宋德音

冊立皇太子德音

疾愈德音

朝元御正殿德音

上郭太后尊號冊文

冊景王爲皇太子文

命皇太子即位冊文

長慶宣明厯序

南山律師讚

欽定全唐文卷六十七

穆宗

四

優卹將士德音

勅朕聞昭德示威先王所以用武禁暴夷難後代安能去
兵故文德誕敷武備宣耀外以環禦四海內以底靖中原
則軍旅之制有經師律之能必表朕纂承鴻業虔奉丕圖
宵分永懷何以康濟豈獨鼓鞞有感方思將帥之臣征伐
爲心乃寵干戈之士況文武並用古之格言勲舊不酬勞
者何勸惟我高祖太宗以晉陽之旅平一海內肅宗以靈

武之衆收復二京代宗有郊郊元從之臣德宗有奉天戡
難之士每念勲伐無忘寢懷如聞近日武班之中淹滯頗
久雖負材畧無由自明又有諸道薦送大將或隨節度歸
朝自今以後宜令神策大將軍軍使及南衙常參武官各
具由歷授官年月前後功績牒送中書門下若勲伐素高
人才特異者候有相當用處即具名聞奏量加獎擢其常
參武官資考深久未得遷轉者準具員年月與改轉不得
令有淹滯其先授文官者亦宜準此使幕賓寮皆有年限
改轉軍府大將豈可獨不序遷自今已後諸道節度都團

練經畧等使下各隨本處是大將名目已曾授監察已上官者並限三周年量與改轉如有功效合非時與改轉者不在此限其職名是兵馬使都虞候押衙已上前後並未曾奏官者亦仰量績效奏官轅門委質營壘分師有役干戈無由耕稼況自天寶已後屯兵七十餘年皆成父子之軍不習農桑之業一朝罷歸墮畝頓絕衣糧言念饑寒深用嗟憫應天下節度都團練防禦經畧等軍所置軍數各委本道據守舊額以度定數不得輒有減省其有逃亡病死及過犯解退當時揀擇有武力藝能者添補奮於行陣

金匱要略卷之二十一
決命捐軀不顧危亡每嘉忠烈官健有死王事者三周年
不得停本分衣糧如有父兄子弟試其武藝堪在軍中承
名請衣糧者先須收補孝本安親深惟養老用數恩惠以
慰耆年應軍將及官健有父母年及九十已上委本道本
州每至節歲量與酒麪優養守塞備邊固不可廢煙塵既
靖亭障無虞諸道舊有防秋兵馬已在邊上者自依年限
替代近者師旅屯集饋餉頗多不免於諸道留州留使錢
內每貫量抽二百文以充國用幽鎮既已洗雪供費亦漸
有常其河北諸道及山東兗鄆淄青汴宋陳許徐泗澤潞

河陽鄭滑等道并邊上諸鎮並不用抽刁斗晨嚴烽煙夜
警勤勞沙塞寒苦邊陲其沿邊鎮戍烽子等並委所管節
度及城鎮使量與優賞仍與交番上下使其勞逸得均使
命往來本於傳達軍期緊急遂至繁多非唯郵傳不供抑
亦號令難一自今已後應緣山東行營兵馬未歸本道已
來進退事機並宜專委節度使仍仰條疏舊弊一一奏聞
除事關迫切須遣專使外其餘書詔文牒一切分付度支
入遞發遣制使中使到諸道行營不得輒受人事錢帛及
行非理鞭扑當加檢察義不優容權筦之設誠爲救弊隨

方適變所貴使人其河南河北鹽法宜委鹽鐵使與本道
節度使審度會計商量務以便人爲法閱習土宜則通吏
理旣因試効可驗政能應河北諸道宜委觀察使訪察管
內見攝官中或清強有才能課績者具前後所攝年月并
事跡聞奏當與正授從政之方必原風俗視人相土乃合
所宜弛張在達於無私法令所期於不擾應河北諸道並
兗鄆青等州道應有新舊科條有不便於俗者委宣慰使
與所在長吏商量廢置務從人欲於戲朕戴天子人操執
重器不以四海之富而恃其力每以百姓爲念而兢於心

慮文教之未敷思武畧之多闕所以輟食當宁求衣未明
揣摩萬機寧止三省頃以馭宇之歲藩方乂安委於廟謀
以輯軍政而有司不達苟以惜費爲心致滋停減之名無
裨毫釐之用使軍中老幼愁歎無歸朕博聽羣言用革前
弊舉其指要冀叶羣情庶乎侯伯列城典我師旅勵精撫
士用副憂勤中外布宣明知朕意

赦鎮州德音

門下仲尼有言詩云執轡如組審此言可以爲天下也蓋
爲聖人組修其身而成文於彼故伯益贊禹則曰滿招損

謙受益所以服有苗夏后啟亦云吾德未至教未善故能
克有扈苟齊俗有禮化人以躬尚可感於神明柔於蠻貊
況累聖遺教昇平舊風堅金在鎔惟人之所鑄猛獸在柙
由人之所馴因而撫之敢忘前訓朕以菲德纂承鴻緒屬
先皇掃刷中寓康濟兆人八表晏然五兵咸息常兢懷於
繼述思致理於和平豈以樂戰爲心佳兵在念而鎮州以
承宗云亡自歸誠款幽州以劉總懇志願釋兵符相繼來
同無思不服非朕勤於遠畧力以致之亦旣綏柔咸加霈
澤不愛金帛以惠我戎士不愆爵賞以寵其偏裨復以一

二台臣常推謹愿庶將朕志以靖方隅而佚於旣安莫能
思患曾未累月旋聞叛離朕亦欲因其人心命將擇帥顧
念宏正盡忠先朝身嬰陷害家受屠戮爲之元首能不痛
心是用下制先申告諭求其凶惡冀釋幽冤仍令四面節
制各守封境不欲遽加誅討所望自效忠誠而將士等懼
罪以相保王庭湊爲衆之所逼固其封壤捍以兵鋒每聞
戰爭永念黎庶爲之君父又何忍乎是用輟食忘寢晝夜
萬慮恭惟烈祖之訓必用兼愛之心務以安人爲國本不
以窮武爲威力顧予寡昧敢忘遵承爲追念而興師已極

君臣之分爲軫憂而捨罪豈非帝王之道況王庭湊倉卒之際固非始謀接之以恩榮自當展其志義委之以戎鎮必冀效於勲庸禍福無門行之則是弛張在我用亦何常苟推信誠便保忠順苟得其衆孰非吾人擢而任之式示光寵宜特舍雪仍授檢校右散騎常侍兼鎮州大都督府長史御史大夫充成德軍節度鎮冀深趙等州觀察處置等使應成德軍將士官吏一切依舊待之如初仍令兵部侍郎韓愈充宣慰使於戲朕於彼三軍惠非不至於彼闔境恩非不周今宏寬大之典以應陽和之令使離散者見

親愛之樂暴露者歸室家之安各宜感悅以就寧泰布告
中外體朕意焉主者施行

平汴宋德音

理天下者務於安遐邇致康濟者資於懷兆人朕統馭萬
邦式敷王度任藩方以俾乂冀干戈之載戢虔恭惕厲未
始暫忘推予是心布及中外昨乃夷門逐帥逆將興師蒼
黃變生士庶無告逆賊李齊驅掠忍害流離毒痛在浚之
郊若鼎將爨逼脅我軍士盜竊我戈鋌驅馳外垆敢肆蜂
蠹朕所以不降明命未行天誅容其革心以示迷復蓋以

欽定全唐文

卷六十七

穆宗

六

一方軫念三面開羅將宏愛物之私用表好生之德而梟
音恣醜狼顧憑凶危巢已焚禽息猶若光顏韓充曹華智
興等感激忠勇揮戈誓師雷奮鼓旗所向風靡逆黨殲殄
郊原霧清熊羆之師漸及摩壘夫疾風斯來而勁草方辨
熾火將燎而良金益明果聞義烈之臣奮起轅門之內一
揮斬首三令無喧嚴城洞開以候來帥永言忠効是錫寵
章其梟斬逆賊李齊宣武軍都知兵馬使李質已從別勅
處分忠武充海武寧鄭滑等軍將士等感主帥之忠誠忘
身赴敵視寇仇而忿嫉決命爭登高承簡以睢陽一郡之

師當蛇豕奔衝之勢咸能勦其醜類如刈草菅各振軍聲
用宣威畧其忠武充海武寧鄭滑應赴行營及宋州將士
等並節級各有賞物已別處分支給委本軍據功勞額例
給散歸還之時仍加宴勞朕念彼無辜墜此塗炭橫爲凶
狡驅脅傷痍其汴州管內州縣官吏軍鎮將健及諸色職
掌人等頃罹脅汙自拔無由撫事量情亦可矜恕除同惡
巨蠹者其餘一切不問仍加榜示如或妄有恐嚇言告者
科其反告之罪干戈暫興里閭必害眷言農畝是廢耕桑
其汴宋鄭三州罹此凶逆士馬屯集供億併繁雖事乃徇

時而人亦勞止予懷軫念豈忘優矜其三州管內有兵馬所到州縣百姓或被驚擾處且於今年秋稅三分內量放免一分仍委州縣長吏切加綏撫其賊中雜差點子弟夫役放還鄉里俾安生業其中有不能自存者量事優卹應百姓中有被分外無名賦斂者並當時勒停義士忠臣見危死節賞功褒美冀及殤魂惠卹其孤庶明報効軍有陣亡將士等并李齊爲亂以來有潛謀効順誠節可嘉并因此遇害者並委本軍審勘具名銜事跡申奏當與甄獎及加褒贈仍令本軍優給其家三年不停衣糧并委所在州

縣速爲收葬量事致祭其將士有因戰陣傷損尤甚以致
殘廢者各委本軍厚加優卹仍勿停解掩骼埋胔國之令
典迫於凶醜深可傷嗟念其本亦吾人蓋由事非獲已其
經戰陣處所有賊中遺骸宜令所在州縣隨事收瘞勿令
暴露嗚呼弔伐之道予遵格言靖寇安人豈忘終日朕載
櫜弓矢思保黎首而雨露所均動植所繫一夫竊歎朕每
興懷況茲浚郊都邑之會所以慎擇將帥期於乂安今寇
孽已清封壤寧息師之所處用軫於中將申宥恤之恩庶
息瘡痍之後布告中外咸使聞知

冊立皇太子德音

朕上奉宗祧下臨邦國承烈祖垂鴻之慶當累聖奕葉之尊祇膺寶圖敬守丕業體明離立象之重表青宮建嗣之崇元良以貞國本斯固皇太子湛恭孝溫文生知夙稟日者春闈尚曠東序未興朕嘗訓以義方舉明嚴敬匪資調護已達詩書克保承休爰當主鬯膺茲典禮慶感良深踐位少陽允孚明命用宏惠澤庶洽兆人自長慶二年十二月二十日昧爽已前天下應罪合死除犯賊降從流流罪已下遞減一等左降官及流人並與量移亡歿者任歸葬

文武常參官及諸州府長官子爲父後者賜勲兩轉緣冊
太子攝太尉稱賀攝侍中承旨宣制進中嚴外辦攝中書
令讀冊授冊各賜爵一級其行事職掌官及書寶宣冊昇
舉冊寶禮儀使禮官等三品已上賜爵一級四品已下加
一階撰冊文官特加一階仍並賜物有差導引官各加一
階鐫造冊文及禮生等賜勲有差文武常參及陪位官并
宗子諸親賜勲一轉景王府官量與進秩夫師賢友善庶
發清明習近性遷必資宏道所以慎簡師傅用保賢良其
太子侍讀宜委中書門下精選二人具名聞奏

疾愈德音

朕遐思三古旁考百王邁德彰仁在於兢慎故詩稱翼翼
易美乾乾惟此之格言豈忘於終日況天地之仁莫先於
利物朕乃者膳飲非適興居不時風霜所侵遘癘虐疾賴
上元降鑒列聖垂祐尋克有瘳至於安節深慙慎德重切
貽憂爰因康復之初式表精勤之至況江淮旱歉滑鄆水
灾方念恤人寧忘約已應緣御服及器用在淮南浙西宣
歙等道各供進者并端午降誕常例進獻等一切權停其
諸道每年準旨條合貢者委度支商量䟽理如非切要涉

於冗費者一切停進夫適情悅目肆巧雕文翫好雖充農桑實蠹朕將齋服應用每念黎元應諸道除常貢外不得別進翫好之物近日諸道多奏祥瑞且休徵所感靈跡所昭必驗祥經應乎元化自今已後除合準式申奏外餘一切不得妄有進獻虛爲煩費卑宮菲食常遵大禹之心馳騁畋遊每奉元元之誠朕勞思惜費恭念好生將欲濟人期於尅己每日供御及供宮內食料等一物已上各委本司商量節減仍具所收費用數速分晰聞奏當付度支管計以添充經用五坊鷹狗之類量留充備蒐狩之外一切

盡放其淮南等道當臨遣使臣別有處分於戲天鑒在上
敢不嚴恭人視在下敢不兢畏旣驗有喜之兆永懷無逸
之規凡在中外宜表朕意

朝元御正殿德音

朕以寡昧獲守重器兢厲畏惕於茲五年皇王之事罔不
修備而大典有闕舉而行之粵以元正朝於正殿百辟咸
序萬方來庭思欲推至仁以布和奉天時而施令況上蒼
貽慶列聖垂休輔於予躬以致寧復思與臣庶同被慶靈
俾茲囚隸亦洽流澤自今年正月一日已前犯死罪者並

降從流流罪以下遞減一等其故殺官典犯贓犯十惡者並不在降等之列左降官未曾經量移者與量移近處流人各據本年限與減一年如本限只一年者放還朝賀之禮國之盛事肅恭班位敷贊威儀俾申慶賀以示宏普其應元日緣朝賀行事官三品以上賜爵一級四品以下加一階文武常參官并六品以下及宗子應陪位者并諸道賀正使各賜勲一轉先已至上柱國者任迴與周親諸藩陪位賜物有差今兵革甫寧典常粗舉雖慙至理可謂小康惟水旱猶虞黎元重困公私蓄積頗有未豐宜令諸道

觀察使刺史各具當處利害其有弊事可革有便於人者并言何術可以漸致富庶附驛以聞亦不用專使詣闕以致煩費其封畿之內百姓利病委京兆河南尹具以條奏於戲束帶立朝必咨忠讜濟時利物式佇謨猷其文武百僚各上封事極言得失無有所隱如有事可施行者便委中書門下量加獎用朕以執契馭時任賢興化孜孜王道期致太和凡在官寮宜悉此意

上郭太后尊號冊文

伏以正坤元母天下符至德以昇大號因景運而飾鴻猷

煥乎前聞焯彼古訓以極尊尊親親之義明因天事地之
經有自來矣伏惟大行皇帝貴妃大虹育慶霽月披祥導
靈派於昭回洽殊仁於氣母範圍百行表式六宮粵在中
闡流宣陰教輔佐先聖勤勞庶功顧以冲眇遭罹閔凶荷
成命於守器之時奉寶圖於鑄鼎之日哀纏易月痛鉅終
天而四海無虞萬邦有截仰惟顧復之德敢揚聖善之風
謹上尊號曰皇太后

冊景王爲皇太子文

維長慶二年歲次壬寅十二月丁亥朔越二十日景午皇

帝若曰於戲惟辟奉天必建儲位率命上嗣以立人極所以大一統而貞萬邦也粵我祖宗乃聖乃神繼體垂休奄宅四海洎於寡昧祗荷丕緒夙夜兢勵深惟永圖用稽古命嗣以承無疆之慶咨爾元子景王湛粹哲自天溫文在躬夙成厚德弗形幼志爰謀表社克彰孝恭敏事居敬日新其度是用命爾爲皇太子爾其欽哉主善勿懈由禮勿違勉以入德勤以聚業修志罔怠自誠而明則可以刑於邦家對於上下用光我烈祖之休命可不慎歟

命皇太子即位冊文

維長慶四年歲次甲辰正月辛亥朔二十六日景子皇帝
若曰惟天輔唐德我祖宗克答天意邁德勤道紹休大業
洎予一人嗣守四海祇事天地愛育萬物罔或怠惰於茲
五年今寢疾彌留不興不寤獲以重器付之元良咨爾皇
太子湛列祖儲慶自天生德孝友慈惠溫良肅恭必能輯
寧邦家輝光緒業是用命爾陟於元后宜令中書侍郎平
章事牛僧孺奉冊即皇帝位爾有孝敬之志可以奉宗廟
爾有廣厚之量可以奉神祇和惠可以撫萬邦仁愛可以
親九族任賢尚德遠佞去邪爾惟欽承無忝我祖宗之休

烈

長慶宣明歷序

古者聖人莫不研七精之數以察天道設四時之官以授
人事在顓頊之代雖汗漫靡察制度未備然已有重黎二
官故可得而述是以欽昊天協時月必首於堯舜之典敘
九章用五紀亦冠於周宗之書則知履端受命斯爲本也
我國家侔天地以制法統陰陽以立極恭惟烈祖嘗所盡
心載誕神人協成律象太史究洛閎之術大慧極容成之
妙而體聖創制蹟隱窮神順時氣之發斂考星度之䟽密

故亦窮變化洞窈冥矣然後陰陽和刑罰清八風之敘立萬物之序成累聖績序必更紀歷推體元居正之道彰敬授惟新之法斯舊典也曷敢廢乎朕以菲薄未明至理荷祖宗之耿光守聖人之大寶深懼不德獲戾於上元感易象之隨時懷禮經之聽朔又嘗覽漢丞相魏弱翁之奏以爲帝王法天地順四時以理國家奉宗廟安天下之大禮也爰命太史洎乎疇人候望於清臺論思於別殿究以微妙考其禎祥觀渾儀以見天心視圭景而知日至則八卦之氣不雜百工之職允釐豈必於記威鳳之晨晦明無爽

候仙冀之英弦望不憊今勒成三十四卷命之曰長慶宣
明歷承唐堯授人之規庶於是矣效軒后合符之驗非所
企焉因敘制作之由在乎篇首

南山律師讚

代有覺人爲如來使龍鬼歸降天人奉事聲飛五天辭驚
萬里金烏西沈佛日東舉稽首歸依肇律宗主